

Newspaper	Harakah
Date	26/4/2013

Garis panduan kerajaan sementara *Harakah - 26/4/2013*

KUALA LUMPUR: Berdasarkan konvensyen antarabangsa, semasa tempoh kerajaan sementara, sesebuah Kerajaan Persekutuan dan Kerajaan Negeri yang menjadi kerajaan sementara itu mestilah bertindak berdasarkan garis panduan yang telah ditetapkan.

Berdasarkan garis panduan tersebut, sesebuah kerajaan sementara yang bermula dari tarikh pembubaran Parlimen atau Dewan Undangan Negeri (Dun) sehingga kerajaan yang baru dipilih tidak boleh:

1. Membuat keputusan-keputusan dasar dan utama yang berkemungkinan besar akan mengikat kerajaan yang akan dipilih.
2. Mmembuat perlantikan-perlantikan penting;
3. Menandatangani kontrak atau perjanjian besar dan utama (major contracts or undertakings).
4. Mengumumkan sebarang geran kewangan baru dalam apa jua bentuk sekalipun atau apa-apa janji yang berkaitan dengannya.
5. Meletakkan batu asas dan lain-lain, projek atau skim dalam apa jua bentuk; atau
6. Membuat apa-apa janji baru bagi membina infrastruktur atau melaksanakan projek-projek awam.

Kerajaan sementara sama ada di peringkat Persekutuan atau Negeri tidak boleh menggunakan, dan hendaklah memastikan bahawa tidak ada sebarang sebab untuk diberikan untuk sebarang aduan bahawa ia telah menggunakan kedudukan rasmi untuk tujuan kempen pilihan raya dan khususnya:

1. Anggota Kerajaan Persekutuan atau ahli-ahli Majlis Mesyuarat Kerajaan Negeri tidak boleh menggabungkan lawatan rasmi mereka dengan kerja pilihan raya dan tidak akan menggunakan sumber, kenderaan, kakitangan dan jentera kerajaan semasa kerja kempen pilihan raya mereka.

2. Jentera, sumber, kenderaan dan kakitangan Kerajaan Pusat dan Negeri tidak boleh digunakan untuk kepentingan kerajaan sementara dan, khususnya, tiada Kementerian, jabatan, agensi atau alat-alat kerajaan yang lain atau badan-badan berkaitan kerajaan boleh diarahkan atau dibenarkan untuk mengadakan sebarang

majlis atau aktiviti yang berkaitan dengan apa-apa kerja pilihan raya atau aktiviti-aktiviti berkempen.

3. Tempat-tempat dan kemudahan awam tidak boleh dimonopoli oleh kerajaan sementara dan parti-parti dan calon-calon lain hendaklah dibenarkan menggunakan kemudahan tersebut sekurang-kurangnya pada jumlah kekerapan penggunaan yang sama banyak serta dengan terma dan syarat yang sama dengan yang digunapakai kepada parti yang menguasai kerajaan sementara.

4. Kerajaan sementara tidak dibenarkan dan hendaklah memastikan bahawa penjawat awam dan pihak berkuasa di bawah bidang kuasa dan kawalan mereka tidak menggunakan wang dari dana persekutuan atau negeri yang disatukan untuk mengeluarkan iklan di akhbar-akhbar dan lain-lain media.

5. Kerajaan sementara hendaklah memastikan akses yang bebas dan adil untuk bersiaran percuma di radio, televisyen, dan lain-lain media penyiaran.

6. Kerajaan sementara tidak dibenarkan dan hendaklah memastikan bahawa penjawat awam dan pihak berkuasa di bawah bidang kuasa dan kawalan mereka tidak menggunakan wang dari dana persekutuan atau negeri yang disatukan bagi tujuan mengadakan atau menganjurkan perhimpunan atau mesyuarat.

7. Manakala adalah menjadi hak pekerja sektor awam untuk mengambil bahagian dalam proses politik, mereka mesti berbuat demikian dalam kapasiti peribadi mereka, mengelakkan sebarang percanggahan kepentingan (conflict of interest) dan tanpa mempamerkan kecenderungan politik mereka semasa menjalankan tugas.

8. Ahli-ahli kerajaan Persekutuan atau ahli-ahli Majlis Mesyuarat Kerajaan Negeri tidak boleh memasuki mana-mana tempat mengundi atau tempat pengiraan undi kecuali dalam kapasiti mereka sebagai seorang calon atau pengundi atau ejen yang diberi kuasa.

9. Kerajaan sementara hendaklah memastikan dan bertanggungjawab terhadap keselamatan semua rakyat secara sama rata, dan hendaklah memastikan bahawa semua polis dan pegawai penguatkuasa bertindak tanpa rasa takut atau memihak (without fear or favour) dalam usaha menjaga keselamatan semua pihak.